

Inatsisartut suleriaasianni § 37, imm. 1 naapertorlugu Naalakkersuisunut apeqquut imaattoq matumuuna saqqummiuppara:

Naalakkersuisunut apeqqutit:

1. Naalakkersuisut EU-mi nunap immikkoortuini internetikkut niuernermit killilersuineq pillugu peqqussummi artikel 2, nr. 13-imi "pisisartuq"-mik nassuiaat naapertorlugu, Kalaallit Nunaanni najugaqartoq danskit naalagaaffianni innuttaassuseqartoq qanoq annertutigisumik pineqartunut ilaatinneqarnerisut pillugu pisortatigoortumik inatsisilerituunit naliliisitsiniarpat, pisiassaq Europami nittartakkakkut pisiniarfimmit pisiarineqarpat aammalu EU-mut ilaasortaasumi tunniunneqassappat imaluunniit tassannga aaneqassappat?
2. Naalakkersuisut qulaani pineqartutut pisisartup nittartakkakkut pisiniarfimmut isersinnaagaluarluni, Kalaallit Nunaanni najugaqarnera, najugaqarfia, postnormua imaluunniit akiligassap nassiunneqarnissaanut najugaqarfia pissutigiiinnarlugu pisiniarnerminik naammassinnissinnaajunnaartinneqarnera, naak pisiassaq EU-mut ilaasortaasumi tunniunneqartussaagaluartoq imaluunniit tassannga aaneqartussaagaluartoq, inatsisinut naapertuutinngitsumik geoblokingit imaluunniit assigiinngisitsinertut isigineqarsinnaanersut nassuiarniarpaat?
3. Naalakkersuisut peqqussummi artikel 5-imi akiliinermut periutsit pillugit aalajangersakkat Kalaallit Nunaanni innuttaasut akiliutaat, bankkonto-t aammalu digitalimik akiliinermut aqqiissutit eqqarsaatigalugit qanoq atorneqassanersut nassuiarniarpaat, ilanngullugu Kalaallit Nunaannut attuumassuteqartumik akiliinermut periuseqarnerisut pissutigalugu nittartakkakkut pisiniarfiup akiliut inatsisit naapertorlugit qaqugukkat itigartissinnaaneraa?
4. Naalakkersuisut uppersarsinnaavaat suliffeqarfiit Kalaallit Nunaanni taamaallaat pilersinneqarsimasut aallaaviatigut peqqussummi suliffeqarfittut pisisartutut illersugaasutut nassuiarneqartumut ilaatinneqanngitsut, aammalu taamaappat Naalakkersuisut kalaallit suliffeqarfiisa Europami internetikkut niuernermit assingusumik periarfissaqarnissaat anguniarlugu suliniuteqarniarpat?
5. Naalakkersuisut danskit oqartussaasui suleqatigalugit Kalaallit Nunaanni innuttaasut inatsisinut naapertuutinngitsumik geoblokingimut tunngatillugu naammagittaalliutaat Danmarkimi Forbrugerombudsmandimit suliarineqarsinnaanissaat aammalu Forbruger Europa aqqutigalugu atorneqarsinnaasumik ikiorneqarsinnaanissaat qulakkeerniarpaat, kiisalu Kalaallit Nunaannut immikkut sammitinneqartumik naammagittaalliortarnissamut erseqqissumik ilitersuummik tamanut saqqummiussiniarpat?

6. Naalakkersuisut Kalaallit Nunaanni innuttaasut suliffeqarfiillu Europami internetikkut niuernermut periarfissaat Kalaallit Nunaata, Danmarkip EU-llu akornanni suleqatigiinnermut pioreersunut, ilaatigut OCT-EU-mi oqaloqatigiinnernut aammalu EU-p Nuummi allaffeqarfianut, qaqinniarpaat, najugaqarfinnut, postnormunut, akiliinermut periutsinut, nassiussat ingerlateqqinneqartarnerannut, maalaaruteqarnissamut aammalu pisiassanik utertitsinermut tunngasunik aaqqiissutissarsiornissaq siunertarlugu?
7. Naalakkersuisut qaqugu iliuusissatut pilersaarummik aalajangersimasumik saqqummiussissappat, tassani oqartussat akisussaasut, piffissaliussat aammalu aningaasatigut kingunerisassat ilanngullugit nassuiarneqarlutik, Kalaallit Nunaanni innuttaasut suliffeqarfiillu Europami internetikkut niuernermi inatsisinut naapertuutinngitsumik geoblokerimik aammalu aningaasartuutininik saniatigut nammagaqartinneqartarnerat annikillisinniarlugu?
8. Naalakkersuisut isumaqarpat, Kalaallit Nunaanni innuttaasut suliffeqarfiillu maanna killilersugaaneq geoblokerimik eqqarsaatigalugu akuersaarneqarsinnaasoq, imaluunniit Naalakkersuisut ajornartorsiutip aaqqiivigineqarnissaa anguniarlugu aalajangersimasunik suliniuteqassappat?

(Inatsisartunut ilaasortaq Jens NapātôK', Naleraq)

Tunngavilersuut:

Kalaallit Nunaanni innuttaasut suliffeqarfiillu akuttunngitsumik misigisarpaat nioqqutissat danskit imaluunniit Europami nunani allani nittartakkakkut pisiniarfinni nassaarineqarsinnaallutillu inniminnerneqarsinnaasut, kisianni pisineq naammassineqarsinnaasanngitsoq. Kalaallit Nunaat nunatut toqqagassaasinnaanngitsoorsinnaavoq, kalaallit najugaqarfiisa allassimasui postnormuilluunniit itigartinneqarsinnaapput, imaluunniit pisisartup najugaqarfia, akiligassap nassiunneqarnissaanut najugaqarfia, akiliutaa imaluunniit digitalimik akiliinermut aaqqiissutaa pissutigalugu akiliineq mattunneqarsinnaavoq. Taamaammat ajornartorsiut taamaallaat nittartakkakkut pisiniarfiup Kalaallit Nunaannut toqqaannartumik nassiussiumannginneranut tunnganngilaq, aammali innuttaasut pisiniarsinnaajunnaartinneqarsinnaapput, naak namminneq Danmarkimi imaluunniit EU-mut ilaasortaasumi allami nioqqutissap tunniunneqarnissaa imaluunniit aaneqarnissaa isumagisinnaagaluarlugu.

Kalaallit Nunaat EU-mut ilaasortaannngilaq aammalu EU-p niuerfittut ataatsimoorfiata ilaginngilaa. Taamaakkaluartoq innuttaasut danskit naalagaaffianni innuttaassuseqartut Kalaallit Nunaanni najugaqartut EU-mi innuttaassuseqarput. EU-p geoblokerimik pillugu peqqussutaa pisisartup innuttaassusia, najugaqarfia imaluunniit suliffeqarfiup

pilersinneqarfia tunngavigalugit EU-p niuerfittut ataatsimoorfiata iluani assigiinngisitsinerit inatsisinik tunngaveqanngitsut ilaannik pinngitsoortitsinissamik siunertaqarpoq.

Taamaattumik pisariaqartinneqarpoq pisortatigoortumik aammalu erseqqissumik inatsisilerinikkut naliliisoqarnissaa, malittarisassat Kalaallit Nunaanni innuttaasut qanoq annertutigisumik illersorneraat, nioqqutissaq EU-mut ilaasortaasumi tunniunneqassappat imaluunniit tassannga aaneqassappat.

Malittarisassat ima isumaqanngillat Europami nittartakkakut pisiniarfiit tamarmik Kalaallit Nunaannut toqqaannartumik nioqqutissanik nassiussisussaataasut. Apeqquut pingaarnerusoq tassaavoq pisisartuq Kalaallit Nunaannut attuumassuteqarnera kisiat pissutigalugu itigartinneqarsinnaanersoq, pisisartup pisiniarfiup nalinginnaasumik niuernermi piumasaqaatai akuerippagit aammalu nioqqutissap pisiniarfiup sullissiffigereersaani tunniunneqarnissaa imaluunniit aaneqarnissaa nammineq isumagippagu. Kalaallit Nunaanni najugaqarfik imaluunniit kalaallisut postnormu namminermini nittartakkamut isersinnaanermik mattussinermut, akiliummik atuuttumik itigartitsinermut imaluunniit pisinermik taamaatitsinermut tunngavilersuutigineqarsinnaasariaqanngilaq.

Aammattaaq akiliinermut tunngasut immikkut misissorneqarnissaat pisariaqartinneqarpoq. Kalaallit Nunaanni innuttaasut danskit aningaaserivii, nunarsuaq tamakkerlugu akiliutit aammalu digitalimik akiliinermut sullississutit atorsinnaavaat, kisianni taamaakkaluartuq akiliutaat kortip sumit atorineqarnera, akiliinermut konto-p inissisimaffia imaluunniit akiligassap nassiunneqarnissaanut nalunaarutigineqarsimasoq najugaqarfik pissutigalugu itigartinneqarsinnaasarpur. Taamaattumik erseqqissarneqartariaqarpoq qaqugukku taamatut itigartitsineq pissusissamisoortumik tunngavilersugaasinnaanersoq, aammalu qaqugukku geobloking pillugu malittarisassat naapertorlugit inatsisinik tunngaveqanngitsumik assigiinngisitsinertut isigineqarsinnaanersoq.

Kalaallit Nunaanni suliffeqarfiit suli nalorninarnerusumik inissisimasinnaapput.

Geobloking pillugu peqqussummi inuussutissarsiutigalugu pisisartut illersorneqarnerat suliffeqarfiup EU-mut ilaasortaasumi pilersinneqarsimaneranut attuumassuteqarpoq.

Taamaattumik suliffeqarfik Kalaallit Nunaanni taamaallaat pilersinneqarsimasoq Danmarkimi pilersinneqarsimasumut assingusumik suliffeqarfimmut sanilliullugu annikinnerusumik illersugaasinnaavoq. Tamanna kalaallit suliffeqarfiisa nioqqutissanik, atortunik, kingoraartissanik aammalu pisariaqartunik allanik pisiniarsinnaanerannut killilersuisinnaavoq, taamaalillunilu unammillersinnaassusiannut ajornerusumik sunniuteqarsinnaalluni.

Pisineq aatsaat naammassineqarsinnaappat nioqqutissaq siullermik Danmarkimi toqqorsivimmut imaluunniit akunnermiliuttumut nassiunneqarluni, tassanngaanniillu Kalaallit Nunaannut ingerlateqqinneqarluni, pisisartuq assartuinerimut, passussinermut, toqqorsinerimut aammalu sillimmasiinerimut aningaasartuutunik saniatigut akiliisariaqalersinnaavoq. Aammattaaq nioqqutissaq ajoquteqarpat, reklameroqassappat

imaluunniit utertinneqassappat, Kalaallit Nunaata Danmarkillu akornanni assartuinermut atatillugu kina akisussaannersoq aammalu aningaasartuutit kimit akilerneqassannersut nalornissutigineqalersinnaavoq.

Ajornartorsiut ataasiakkaanik pisisartunut taamaallaat sunniuteqanngilaq. Tamanna inuiaqatigiinni nunap isorartussusaa pissutigalugu akit qaffasereersut aammalu nioqqutissanut sullissinernullu periarfissat killeqareersut eqqarsaatigalugit digitalimik aammalu aningaasaqarnikkut aporfiuvoq annertunerusoq. Kalaallit Nunaata nunami inissisimanera EU-mullu tunngatillugu immikkut inissisimanera innuttaasut suliffeqarfiillu niuernermi aaqqissuussinernut naleqqukkaangamik pisisartutut akuerineqartarnerannik, kisianni nalinginnaasumik niuernermi periarfissanik atuerusukkaangamik avataaneersutut pineqartarnerannik kinguneqartariaqanngilaq.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavigineqassaaq.